

娜

隅

集

姬隅集卷八

上海 趙文哲 損之

辛卯元日六次前韻

獨飲曉起遲日上小牕半謫居簡酬接非曰耽寤歎清
絕十笏廬鉗花紛可玩風簾忽飄颻密雨作絲散殘客
幸不來仍與酒盃伴陰晴固難料以醉娛此旦姜床餘
舊被梁廡有空案定知對屠蘇載咏心曲亂比來強作
達囚首不知鹽稱詩擬寒瘦讀畫愛迂緩倪瓚范寬世稱倪迂范緩
譬諸去金矢魯縞詎能貫五岳願亦違正坐腰腳憊惟
餘苦吟癖如病嗜灰炭呼童淨掃地新意儼改館夕曛

忽挂樹小鳥弄春暖因之豁我愁坐待青粲粲

早春獨游入打鷹山寺

上馬試春衣馬意已先騁遊蹤逐芳草綠到打鷹嶺嶺
雲開處出古寺水匝峯圍斷畦町隔溪指點得松門取
逕烟中轉修迥開堂傳自薊門僧百二十年似俄頃震

鱗從後山泉枯一勺獨留潤閭井

寺前有池旁祀龍神故俗稱寺爲龍王堂

相傳山中水泉頗饒一夕大雷雨泉忽涸獨此池尚存
汲甃賴之明末有燕僧寶藏來此始開山建寺見江陰

徐震客
游記

香茅亭子浸瀟碧手汲清冷不須纓亭陰雙樹

禽無聲偶弄輕颺到芳荇日光映水水映沙不見魚身

見魚影最憐三尺小苔磯却許閑鷗坐相竝重登山閣

頗塏爽回首西州動悲哽庾公遊處今在不寂寞胡床

積塵冷

寺左爲小有山房已丑夏經略相國春和傳公游此因建坐榻尙存

偶逢老樵訥

疇昔齋鼓從敎就如打莫愁獨醉倒載歸自有山風爲

吹醒

人日出遊

酒旗斜處颺春愁隔歲春來翠陌頭人意最宜逢七日

土風偏競戲千秋

鞦韆戲騰越新年最盛

花分馬色迴山郭柳帶

鶯聲出市樓士女不知征戍事試燈早趁月如鉤

游寶峯寺歸途書所見七次前韻

垂鞭向春山寺在翠微半雲林眞入畫馬上先賞歎鐘

磬雖寥閭古意不敢玩雙樹馴幽禽正值曉齋散上有

天梯懸跡絕猿猱伴

捨身崖俗名獨梯

巖雲翳停午海旭騰未

旦山城如斗大磊磊置經案其下多陂池升降羊牛亂

新畬競翻犁饁婦忘櫛盥稍喜戍烽停不使農事緩自

我從軍行略已諳舊貫演民久凋弊患不在屏幘其或

噢咻之冀幸免塗炭曷爲荷戈者尙復羈候館願言陳

芻蕘何啻獻曝暖愧尔祈年人笑指金碧粲

寺之右爲玉皇閣是

日州民祈祝者遠近雲集蓋歲例也

二月八日夜夢至故園東皋草堂與家兄清泉拊

搗先君子舊物中有泥金便面文待詔書前赤壁

賦圖並楷書二賦家兄向予云子素愛此胡可無
詩予遂作七言古詩一章頃刻脫稿兄讀至雷風
泠泠十指出句云此謂客吹洞簫也耶似笛不予
首肯之醒時了了遺忘纔十數句因卽以夢之緣
起補綴成篇而芟其不甚可解者用以攄寫感愴
並郵寄京師屬兒子致諸家兄庶知萬里外子弟
猶在焉爾

憶昔草堂弄梨栗文度時時抱著鄰乞

去

兒一物三絕

兼東坡餘韻衡山筆自從薄宦走人海舊物飄零半付
銷九原子季望空懸白首從軍枕刀韜回思往事真似

夢卅載匆匆換庚蟬昨宵入夢是何因
悵喜對床雨蕭瑟田廬舊識薛包心
摺疊湘筠此其一謂我作詩詠咏
之髣髴從游溯江涌扁舟載月兼載酒
看盡西山碧峯萃座中吹竹者誰子
霜風泠泠十指出放臣蕉萃吟江
渾思婦徘徊歎居室且將斗酒洗餘悲
旣醉不歸爵多逸臨臬人去五百年
貌得脩髯神彩溢復書二賦細於
髮八十老翁健無匹

賦後書欽云八十三齡文某

風流照映兩不朽

倘遇懷瑾估幾鑑我兄好古癖過我
偶向晴窓排甲乙父書忍讀手澤存
和淚題詞滿綳帙吁嗟覺原非眞夢
非幻神逐魂游孰致詰乘車鼠穴理
則無曰正曰思是

宜吉夢中春艸吟難成扇上秋雲看易失陟岡知我在
何處誓墓期君念他日不須更召太人占屈指三年我
征聿

春夜重過大樹園感舊聯句二十韻

園在騰越州城西南隅已

丑夏五經略相國傅公所葺
偕僚屬治事憩息之地也

大樹今無恙王昶閑門昔屢經重游耽寂寞趙文蔚相
對話飄零春半花如埽昶宵分竹自扃林漲初逗月菴
葉鏤忽穿星泥潤新除逕昶落荒舊憩亭履綦懷往躅
文哲翰墨認前型台座愁頻圻相國傅公及副相昶
阿公已先後捐館昶蠶
暇恨未寧仍煩神筆運謂雲岩先生文哲幾見旅驂停卜夜

客疎放迹遵塗入杳冥居然成傳舍文者聊爾比郊垌
噩夢猶餘悸和嘉謨憶共聽談溪歌更哭文者吟苦醅
還醒泛泛杯浮白和幢幢燭暈青歲時三改燧文者身
世兩漂萍羈迹同齊贅和鄉音伴楚伶虛舟先負壑文
者陋室尙留銘相國有園記尙存誰分愚公谷和入稱謝傳庭
山楹當睥睨文哲仙刹傍岑岑到處鴻留爪和歸來鶴
蛻翎金城搖落意文哲沾灑問園丁和

騰越州治東數里有何氏舊池館杜鵑最盛己丑
春曾偕家雲松游焉水竹幽蔚花光絳天爲裴回
久之雲松旣返粵西予顧頻還往於此又值花時

遣奴子探視云已試花十數日後當大開予適以
事遽返永昌遂不及往臨發惘惘輒爲此詩寄雲
松對牀聽雨之外此又一可感事也

蠻鄉二月花如海繫馬青楊巷未改天涯白髮幾春風
差喜花前故人在繁紅罨戶芳晝陰游絲千尺搖春心
茅亭臨水短於艇一篙疑入桃花林絳雲團枝霞倚樹
日影波光眩朝暮花深深處醉眠多粉蝶隨人出無路
花開相遇典春衣花落相思減帶圍又見啼紅遍山郭
登臨何日送將歸劉郎老矣空前度莫怪東君苦相誤
多恐重來不忍看故遣搖鞭背花去

騰越曉發過甘露寺值牡丹大開竚玩久之憶初
從軍時過此看花已二年矣偶占四絕句

山寺朦朧隱曙霞
天香先透竹籬笆
征人何事聞雞起
爲看僧廬帶露花

雪碗脂盤任客誇
停鞭且吃已公茶
二年前已朱顏改
倚檻重看豔豔花

堞風萋露日交加
那得重重繡幔遮
莫以路旁輕折取
佛香影裏數枝花

青絲汲酒興終賒
門外蕭蕭響馬槌
多恐輕陰便成雨
暫時畱看未殘花

八灣卽事

嶺雲閣雨故徘徊嶺下邨墟夕照開人自猿聲深處下
瘴從虹影斷時來二分春去炎飈鬱三宿綠留旅鬢摧
予往來騰越凡八過八灣此寓已三宿矣卽次未容安一枕怒江入夢怒如雷

至蒲縹重宿楊氏書樓有作

細馬垂鞭穩似舟到門雞犬亂瓜疇迴溪綠界東西市
列岫青延上下樓敢說梅詩蠻布在差欣翟舍夜關留
偶經桑樹猶餘戀何況吟牕一榻幽

薄暮大雷雨再示楊生

片

蠻鄉春候鬱恢台樓閣俄驚爽氣回萬壑雷盤雲不動
千林風截雨初來中宵涼影侵燈燭獨客愁心入酒盃
倘寫老坡作圖畫明朝借屐踏蒼苔

永昌得錢辛楣學士書却寄八次前韻

易羅水一勺鯉魚無尺半素書從何來釋我當食歎讀
罷置懷袖分作三歲玩學士今儒宗品地壓黃散憶昔
春明門蕭然素心伴著述樵馬班寤歌接伊旦矢之蒼
松枝貽以青玉案敬奉穆如篇每許起爲亂自從歸子
舍眷戀雞鳴盥頗聞庭誥勤趨

朝戒毋緩去佳迹未岐出處道本貫吾哀果何爲自以

憤勵慙杜牧有罪言近已學吞炭空留喻蜀文曷足付
芸館思歸亦良苦尙念挾纊暖君如終惠存最彼門子
粲

來書過誇兒子
秉淵近狀故云

感遇九次前韻

子美吏隱兼長康癡黠半今吾定何如自笑還自歎遇
事論短長久欲愧陸玩又愧殷伯道避賢趁行散咄咄
坐書空獨與形影伴已爲斷尾雞何若強知且覆鹿試
追求盜羊可并案莫訝歸夢濃無奈啼鴉亂平生一片
心不用洗玉盟誰令州閭會雅琴彈嘽緩薰蕕強從同
涇渭反相貫可憐臣精銷曷敢諱衰慙微命輕鴻毛日

試陰陽炭此身果安歸故園亦假館壺冰自知寒熨火
自知暖孰通繫表言千載望荀粲

李隨軒學使以按試來永昌破例先過寓齋數語
卽別賦此奉柬十次前韻

美酒飲未中好花開未半樂事會有期能免愁知歎別
君經一年日把尺書玩毛玄愧蕭敷鄭虔苦樗散萬事
不挂眼惟憶對牀伴聞君來按部如夜待明旦已今掃
室廬或遣拭盃案反愁話西牕不辨更籌亂及君枉車
騎出迓豈暇盥匆匆一傾蓋未許少遼緩諸生方鵠立
屬吏儼魚貫羊陟造元叔事已駭愚悞故入恥言寒詎

敢累薪炭何時撤籬棘開逕達行館子寓齋與君行署僅隔一垣剪燭屢見跋進食勅數暖忘憂無護艸借君舌蓮榮

觀湧珠泉作

薄薄九地水蛻之氣又蛻水水不知

亢舍子蛻地謂之水蛻水謂之氣蛻

氣謂之虛玲瓏萬竅隨處湧沙土不汨光牟尼保山之陽易

羅池厥象爲蒙位則離我作犀首苦無事時向池上岸接離元珠赤水誰所遺兩手無從掬纍纍日光倒射不見水星點自綴青玻璃疾徐斷續無定姿珠亦水耳水自爲未離於水仍化水空明一片何成虧大波曰淪小漣漪蘋末偶然漾差差雨餘浮泡倏起滅嘆息逝者皆

如斯水輪孰挽風輪推若有憑焉以息吹寓形安足辨
眞妄愛此寒碧侵須眉游魚何樂鷗不疑一艇撐出蘆
之碕八關戰塵不到處人物相與爲娛嬰頻來照髻雪
幾絲水哉依舊清無溜臨流我已忘去今我盍往質之
价禪師

浴金雞邨溫泉

醴泉自言甘療飢乃不及糠覈溫泉自言靈蠲疴乃不
及磁鐵一鞭偶過金雞邨聊洗當年戰場血南州炎德
古所云隨地丹砂自融結元扃不閉陰火然沃此瓊田
三尺雪澹澗玉乳滋清冷井華淥深簾何處逗東風盎

盎春和浮歟穴振衣一作盤礴羸病馬無端脫塵紲歸

途重懷古從事有遺烈永昌風俗敦此事青史揭村爲後漢

呂凱故居武侯謂不意永昌風俗敦厚乃尔爲凱發也好語婆娑市上人三日休

耽秉蘭節

增外別有一池士女浴者頗衆時上巳初過故云

送譚曉東太守之任黃州三首

未曾見面見留題山寺籠紗憶定西

予先未識君過定西嶺僧寺見君留

題心不是心勞殷撫字何由政暇數入攀躋官閑典午

餘吟嘯民少呼庚忘非鼓鼙纔說一麾移楚望卧轅人

已競扶携

昨歲屏風姓氏畱除書

親注澤南州

君先以中甸同知陞見稱
旨未幾有黃州之

命月明赤壁移蘭槳雨暗黃岡卧竹樓漫說古今常不

及況聞仕學本兼優依然水合山環處鼓角聲中鎮上

游

感時惜別兩嗟咨何幸源明識紫芝

聖主正傳罷兵詔

綱逆不庭
上以民力宜予休息近降

明旨暫
停進討

大夫應念告勞詩三年戎馬吾將老萬里雲霄

子未遲難爲窮邊陳借寇幾人洒涕問瘡痍

楊枝十二韻

爾本銷魂種年年綰別離一株當二月萬縷復千絲栽

處應天上攀來每路岐未歸陶令宅頻夢謝家池態倚
疎簾勝陰籠曲檻宜濃疑掃眉黛弱欲回腰支著雨憐
初起臨風愛小垂金城悲此地玉殿憶當時細馬看還
繫流鶯聽乍移尊前人不見笛裏客相思我往成搖落
誰來屬護持香山戀樊素只爲是楊枝

查儉堂觀察自蜀寄示查氏一門烈女編敬題長
句

查於勝國爲清門蕭斯之渥葉至根有齋女亦競芬烈
寧辨蘅芷蘭荃蕪未亡周母尸內政愛厥娣張如友舅
有姑適黃生女寡歸於丘嫂同饗殮張之側室曰廉氏

其媼老矣以德尊一女周出二張出明珠乙乙胎靈源
甲申寇變內城破蟻緣于垣蜂聚屯戟冠曳履者誰子
草間苟活眞羔豚孰將一髮挽九鼎九婦人克光乾坤
中堂環坐或離立惟周是聽揚昌言我家舊德民所望
墨食三世依帝閭嫠也所欠只一死誓以清白從九原
語未及旣應如響微姆之教敢偷存變彼四女起相顧
袖出一翦香雲溫爭先投繯母曰止死亦有序弗可謾
大家羅拜謝先祖談笑恥作聲淚吞一女踉蹌赴井智
若有物焉與手援母謂兒幼死勿怖復作懸雉衣翩翩
雕梁一桁九羅帕血縷盡化冰雪痕玉肌義不污賊刃

惜汝賊手孰敢捫廉姬周女兩繩斷欲斷未斷迴幽魂
此身忽過桑海劫誰謂止隔一旦昏女長而字亭眉壽
廉洗粉黛皈祇園當其就死期必死偶不死耳毋異論
西川觀察今文孫一編傳信古史惇我徵逸事重歎息
乃知志節素已敦茄花委鬼昔竊柄烈焰勢欲傾西崑
彼黃姑實諫君舅冰山不待摧朝曦諸黃蔓抄舅獨免
此事今尙傳班鶴更聞張母通訓故敬事伯姒咏背護
三家弱息共閨塾牙尺聲與吟誦喧挑燈每述古列女
厨娘爨婢啼煩冤固宜臨難氣閑定宛得我所終無怨
嗚呼丈夫讀書學何事一失足已踰矩矱閨中識字能

有幾見義勇過有與賁楚臺貞姜水自溺宋宮伯姬火
自燔靈祠榆堊峙終古年年風雨飄春旂

吳式齋於騰越州署東偏復葺草堂成寓書乞詩
賦此寄贈

三年從軍行騰越凡四至萬事吾眼見到處輒酸鼻
飛百千羣屯飼萬突騎縱橫塞里廛假館及梵寺
素王宮亦復徙禮器何況守土官尙敢踞廳事
書帷戛弓刀鈴閣亂踰厠樽櫨紛青紅摧燒備晨饔
潭潭府居者固以傳舍視久之就傾頽孰與議修治
頗聞置別館暫作一夕衛露臺良區區寧不余是界
庀工拙嗟間萬

瓦忽鱗次密蔭交芳櫺輕波涌文磬客來譽嘉樹早擬
召伯憇慚予本僇人居是恒惴惴豈無勞者歌出口招
詬詈窮邊斗大城日看釜揚沸昨歲防秋來氣象變凋
弊夜村絕追呼秋吸積遺滯試聽竹馬聲羣頌州來季
問君胡能然稍喜息烽燧年豐民大和一一舉廢墜遂
稽魯侯典首闢文翁肆青衿久徒役乃復好音嗣其他
秩祀崇靡不瞻有闕時值幕府暇往往駐柔轡營室知
所先改弦歎何易泊我歸哀牢重拜尺書惠上言戍邊
卒入夏蒙瘴癘可憐黃茆土風雨委殘飢君爲伐山材
縛屋櫺相比于斯枕重鎧于斯飽宿糒間架逾四百磬

鼓曾未試次言署之右做廬被幽荔葺之復舊觀未惜
俸錢費訟庭近無事停午散胥吏偶然弛巾襪素業及
此肄嘉名肇浣花乞我新詩賞我思杜陵叟稷契平生
志廣廈千萬間天下寒可庇一官屈叅佐播遷跡如寄
高懷竟莫酬老大空涕淚君今典劇州職任重半刺卧
理雖有餘蒙竊陳末議願君宏遠謨仍以肯堂譬古稱
迨未陰牖戶必先計亦有棟隆材撐拄在將毀此州本
戎索密邇犬豕類綢繆良獨難磐石有由致鎖鑰在七
關藩籬在六慰本仁以爲基秉禮以爲範去風琴與雅
管曰與作塗墍熙熙同春臺幘幘廓荒裔此非土木功

成則數世利想見草堂中匠心運無際斷手定何時如
椽筆難記報章留息壤兼以告有位

薄病無聊卽目成咏四首

荷葉

幾日田田碧一窪空亭倚遍石欄斜池塘人靜影臨水
風露曉涼香勝花未許衝波依舫屋最宜聽雨隔窓紗
分明載酒曾游處兩板紅橋綠半遮

苔

一重門掩一重簾逕草堦莎一色添軟碧圓時潤可藉
鶯紅碎處屐同黏端居盡日芳塵斷逆旅先秋舊雨淹

逋客新來行迹絕。翠痕不埽。倍纖纖。

爐烟

庭院沈沈。午悄然。風爐帖妥。屋西偏。更無人影。惟簾影。
纔拂茶煙。又藥煙。偶著銚花。縈未定。忽吹鏡。髮暈初圓。
心知不自勞薪出。愛爾低徊。病榻邊。

禽語

芳林入夏。碧如雲。格磔鉤輈。捲不分。醉倚短筇。閑獨聽。
夢迴單枕。遠初聞。偶然斷續。隨朝雨。幾處高低。度夕曛。
知我機心忘已盡。一枝借得。兩欣欣。

送唐薌崖觀察回普洱三首

雙髻飄蕭閱塞塵一番傾蓋已相親紀羣幸托忘年舊

僑札翻憐識面新

予先識觀察令嗣司馬君於京師泊從軍來滇與觀察屢通書問而握手

寔自今始

病後容顏驚槁瘁醉中肝膽感輪囷深知蕩節遲

留意爲戀天涯放逐人

十三版納遍春耕

觀察爲整欠景海土司定入貢之期復安置內附諸夷官於善地分授田

宅以耕輯之

騎象人來款

帝京

南掌國近遣使款塞入貢

遂使華風通玉斧端資威望重金城

心勞尙念瘡痍在身健翻言瘴癘輕漫憶竹西歌吹路

要君籌筆佐昇平

閉門隔日踏苔紋百感無端話夕曛

詔下休兵歡欲舞詩成閔雨迫如焚

永昌久未得雨連日祈禱方更儒

生入幕慚何補驛路班荆悵易分贈策豈真輕一別歸途竹馬早紛紛

嫺陽集卷八

巳酉五月十日男秉淵恭
校於眉山官署之遠景樓

姬隅集卷九

上海 趙文哲 損之

薛竹君

懷

寫生冊子爲賀白儕太守題

芍藥

依約當堦見折枝墨痕猶帶露痕滋憐余磨盾殘毫在
候館重題小謝詩

繡球

春紅幾日掃空欄素影初擎玉一盤應是東風太無賴
飛來粉蝶盡成團

鰕魚

柳盡成絲荻盡芽空將縮項書中誇依然三尺桃花水
閑煞春江舊釣查

枇杷

又是黃梅數番雨鑄金一點樹同懸誰知穩住家園日
帶葉分來笠澤船

我鄉枇杷以太湖洞庭山者爲佳品

荷

一花微斂露痕薄雙葉斜傾雨點稀多恐江潭易搖落
西風先到楚臣衣

雁來紅

夕陽籬落一叢叢露後霜前點染工比似楓林紅較早

停車人在雁聲中

芭蕉

書師不畫雪中蕉殘綠當風影自搖誰料秋來兩三葉
雨聲著處倍瀟瀟

桂花

一枝金粟報秋開坐覺天香入酒盃漫說山中無限好
直緣叢桂合歸來

蟹

香稻黃時水落塍門前蟹斲若牽繩泥行郭索眞如畫
月黑波聲見一燈

菊

直爲陶公傳小影霜枝雨朶故橫斜東籬風致應如許
不是長安市上花

蘆雁

稻梁無計苦相呼自作南賓歲月徂至竟沙州棲易穩
高飛莫恃有銜蘆

芋菜

曉過蔬畦露滿筐芋頭味與菜根長清貧太守齋厨況
寫入丹青倍覺香

雨中劉錦洲太守招集湯氏園亭小飲卽席成四

律爲贈亭前立石甚奇古梅四五本亦百餘年物
故中二章專及之

老作諸侯客招邀半酒邊論交從絕域爲樂及中年改
席花間雨行厨竹外煙短亭貯書畫宛在米家船

亭名亦米

五嶽去無計一峯看自閑眞應持笏拜不用拄笏攀翠
滴連朝雨毒延入郭山便思此高卧日對小眉彎

健步移何代奇姿得未曾苔膚青有暈石骨碧生稜譽
樹情難忘看花醉尙能閉門一座隔君去喚誰應

檐滴暮初歇尊前引興長談深知客醉坐促愛宵涼扶
屐新莎碍移燈密樹藏高吟看小史應笑季鷹狂

時出明童

行酒故
戲及之

喜嵇蘭谷至永昌

戎馬門關幾載餘，偏從邊徼慰離居。語將永夕聲翻咽，

身未中年髩已疎。此事推袁知不忝，

出示近詩甚工有人借寇

快非虛，

蘭谷被議已二年，今制府將補牘雪其事，例當復官于滇。

茂齊今亦同羈旅，

感憤無勞布遠書。

蘭谷頻過寓齋，用前韻成二章見贈，走筆荅之

試茗分香興有餘，笑談錯比子雲居。清風句好愁難和，

舊雨人稀忍更疎。真遣移情臨杳渺，最欣投足到空虛。

一瓴尙擬從君借，兼兩曾聞戒載書。

來詩有囊中剩有帶來書句，蘭谷將

有都門之行故云

蘭谷復有作柬贈三次前韻

不是愁餘卽病餘
笳簫聲裏閉門居
興來已覺詩筒數
老去休教酒盞踈
高臥恣看山澹蕩
近游最愛水清虛
徵歌倘許携車子
何日繁欽有報書

蘭谷約携歌者同游易羅池久而未

踐散戲及之

感懷四次前韻

不緣夏屋歎無餘
詹尹難從卜我居
絕塞星霜身漸老
故山松菊夢全踈
徒耽蠹簡招賓戲
曾侍

龍旂奏子虛
一跌天南非怪事
淵源咄咄笑頻書

雨夜同述菴蘭谷對奕五次前韻

偶乞閑身小劫餘夜窓一局趁羣居人依燈影看逾靜
子逐簷聲聽漸疎得失從旁誇爛熟輸贏已過笑全虛
平生不賭宣城守直爲忘憂勝著書

反王
隱語

雨後蘭谷招游易羅池小飲賦此兼示魏星園司

馬戲效五仄體二十韻

積雨斷剝啄兩版盡目掩屋角噪午鵲霽色豁有渰定
著幾兩屐野興老未減勝侶枉短札出郭袂共摻指點
遠岫列尙覺翠黛歛有水自潄沸爾雅釋曰濫此地我
久客屢至看不厭瀾瀾漾一碧似展八尺簾百琲到處

湧入掌不可攬水底豈有穴氣蛻九地坎往往見白小腹與日影閃頗喻惠子樂倚遍衆曲檻叔夜齒少亞縱飲劇勇敢司馬本嫵媚古貌碩且儼酌我迨我暇俛仰動百感世事但指口匪以在謫貶素志寄述作欲使後有覽此語復妄發見笑適自點對酒不作達歲月去荏苒後約更秉燭醉卧柳下艣

贈鄂觀亭三十韻

聖作初元政人推太傅勲詞思纏絕微聲望切高靈幾輦承先澤同時殉寇氛鼎鍾傳奕世弓冶紹夫君蚤歲庭騎竹終朝帙散芸志覘諸父遠學擅小侯勤豹尾

偏數

龍顏顧最殷乘槎輕博望請組邁終軍有盜潢池畔徂
征漲海垠十年留戍甲萬里聽軍鼓列柵圍初合綠江
間獨分尙求株下兔未掘穴中鼯戎幕淹淫雨和門壓
瘴雲票姚名自振新息病方憫降欵歸斯受僉謀意共
欣何人非錄錄異日忽云云空抱孤衷鬱其如衆口紛
我猶羈倦翮子又策勞筋感喟追今昔過從接夕昕論
兵嗤鬼谷陳義慕皇墳柳句常題扇羊書半染裙端居
惟避俗雅量故超羣肯逐游禪蝨難驅撲帳蟲漫驚棋
過却只合酒成醺近調防秋旅休妨入夏耘傳符知不

援借箸問誰聞諸葛平蠻地相如喻蜀文雄心隨逝水
陳跡付斜曛交本如投芥言還擬獻芹從茲猷克狀
勉誦前芬

客居四課偶成短歌

種花

昔稱樹人如樹木今我養花如養嬰一枝一葉手培護
翻反已得春風情瘴雲橫空倒白雨狼籍殘紅一朝暮
空欄猶自貯香泥莫問明年看花處

飼魚

齋厨每飯頗有餘上飼簷雀下井鮒臨流見影已狎至

心知此食香餌殊我亦不望雙明珠偶然生趣欣相如
人間網罟不到處一勺之樂同江湖

調馬

征人與馬托爲命不通馬語知馬性勞恐飢疲逸恐病
十日青芻一日騁城東毬塲秋草生一鞭飛處流水平
驕嘶弄影胡自喜八關戰塲爾未經

品茶

昔茶力可蕩胃曷三年飲之面無澤譬諸久病利在養
豈耐醫來攻藥石此理渙人苦未識更以檳榔佐消食
和平獨取太平茶

產順寧

願設衙尊起民瘠

遷寓

白頭瘴海已三年傳舍無端竟五遷眞遺卜居依鶴觀

寓對白鶴觀恰合東坡惠州故事故云

差欣汲飲近龍泉

寓在龍泉門內去湧珠泉數十

耳武補茅屋老秋風勁得樹庭空午日圓衰病不堪重借

箸枕戈時復枕書眠

復遷居舊寓感懷四首

一雨新苔上戟門重來蕭寂似山邨磨牛踏處依陳迹

巢燕栖時掃舊痕悞喜南樓聞躡屐忍忘東閣對開尊

秋風起後庭花盡惟有親栽菊尙存

防秋羽檄自紛紛挂頰看山到夕曛拂策已知居莫定

迴車誰料路還分
季鷹漫決歸吳計
司馬空傳難蜀文
尙擬短衣從夜獵
灞陵爭識故將軍

羅雀門庭刺孰通
一樽孤引雨聲中
心依短燭灰將盡
身對殘碁劫未終
獨向風颭悲退鷁
偶從泥雪認羈鴻
單衾無限春明夢
夜夜常隨馬首東

斗大山城殷鼓笳
中宵人倚步欄斜
敢因去國忘傾藹
不爲懷鄉計及瓜
幕府正聞籌筆數
征途深愧贈鞭賒
時巴韞輝員外將隨
副將軍巡邊故云
殘書襖被安排了
自對寒燈拭劍花

韞輝見示和章再次前韻酬之兼示王湫田太守

鏡吹聲中對掩門素心真似卜南邨愁將白髮依燈影
看取青衫剩酒痕矢石餘生嗟已老詞章小技愧非尊
移居長物吾何有惟有酬恩一劒存

絢閣筠簾靜不紛相逢款語易斜曛喚將酒榼墻頭過
手擘吟箋座上分晚歲蟲魚空著述故山猿鶴漫移文
嚇蠻書在曾何補藉爾毛錐張我軍

平安堠火八關通聚米江山指顧中李牧至今思未已
唐蒙此地怨難終羽林卒勁排鵝鶴上苑書稀斷雁鴻
草草三年對零雨有人墻室嘆徂東

森嚴幕府肅秋筵賓從招尋小徑斜

時開逕道達勅斷於將軍署內

園官朝送菜

初禁邑令不得治供具

誇張旅館晝浮瓜

永昌甘瓜不易致適

得十餘枚分餉諸同人

刺閨未覺軍籌亟負郭終愁隱計賒莫訝

仲宣懷土切登樓時節忝方花

雜題畫冊三絕句

籬角山低翠一堆柴門臨水晚猶開秋林忽響蕭蕭葉
欲問何人擔酒來

蒼苔無雨柳無烟茅屋誰家落照邊是處戍樓烽不到
蘆中穩著釣魚船

蝦渚魚磯不上潮行人三兩暮招招楓林曲處青無路
知是松陵第幾橋

韞輝索觀近稿和余在老官屯時槃字韻詩題後
再次韻荅之

酸螯攪壁鼠窺槃艸檄哦詩夜有程忽對酒盃重感事
偶臨碁局一論兵軍中劇孟誰招致闕下終軍自請行
欲驗當年戰場血殘編猶共墨痕橫

得家書知繡堂歿於京邸爲詩五章哭之

君依多病姊藥銚每親煎及此相存恤如何反棄捐
魂升屋返望眼倚閭懸更遣衰遲客天涯哭少年

不及龔生天膏明早自煎身名生未耀風義死難捐
鵬集庭空掩後窺帳尙懸弥留聞一語物論嘆無年

用干
殉事

酒從子雲飲茶爲玉川煎每有新詩貺能令宿疾捐談

深燈共翦別甃楊還懸舊事從頭數依依十四年

續堂於戊

寅年卽從學于予

昨聞鄉信至早遣旅愁煎一病琴終撇三生佩孰捐刀

頭環未準室內磬如懸歸櫬江城路東風憶往年

淚隨簷雨滴心似釜湯煎事異文姬匿哀同伯道捐山

傾千簣積鼎絕一絲懸不獨悲公嗣嵩邱隔九年

用懷舊賦

中語余離鄉已九年矣

姬隅集卷九

男秉淵恭校

姬隅集卷十

上海 趙文哲 損之

發永昌作

詔移征緬旅問罪入金川亂賊誰終貫天誅爾獨先軍
容徵按堵士氣試鳴弦早有村叻語

王師罷戍滇

三年仍戍籍萬里托吟身白髮搔逾短青山看轉親斷
虹懸劍影殘雨洗衣塵一事雄誇得詩編入蜀新

家雲松間子將過威寧遂不及受代而來握手黯

然緒述已丑夏別後事燭未跋而僕夫促駕矣

馬上成三詩寄之

傷函天未望遲遲一宿郵亭忽有期直爲陟岡嗟子季
故教騎竹慰羣兒吏知適館牽籃輿僕解移燈拭酒卮
草草難成對床話西窓眞負雨如絲

夢裡田園目就荒暫相逢處總他鄉三年心事雙吟髩
萬里游踪兩戰場少作詩篇更世故勉加餐飯惜年光
廣南太守貧難得喜見衙齋似葉裝

丞相軍諮禮最優危言曾遣駭溝猶萊公竟得觀書力
郭令終成折敵謀君已致身酬

聖主吾猶作客托諸侯他時相憶知何處倚遍籌邊萬

里樓

乘舟行江門驛作

金江乘舟歲在丑戰鼓如雷共江吼一聲礮火掠人頂
摧折維舟十圍柳玉門生還血洗衣昆明池畔陳水嬉
雨牀絲竹載雙槳花深深處歌楊枝人生哀樂寧自量
瘴海三年苦流蕩偶然蜀道更從軍放眼關山鬱蒼莽
江門驛前夜捉船人聲水聲喧沸天蘆中漏舟人所棄
我顧我僕來相牽灘流似箭石似虎長年持蒿色如土
天明打鼓到瀘州依舊搖鞭問前路舟行非駛陸豈遲
勞人草草空爾爲可憐馬上有殘夢夢到江南作釣師

初抵成都先寄查儉堂觀察

計日西窓話雨涼，緘愁先與錦鱗將。
青門一別皆岐路，白首重逢是戰場。
負嶮諸番猶反側，懸軍使相尙回翔。
憑君莫問平蠻策，愧說參軍策最良。

羽書閭外自交催，獨坐思君蠟炬摧。
口腹肯教安邑累，軒車應爲杜陵來。
識途老馬嘶風壯，戀侶羈鴻叫月哀。
翻恐相逢一尊酒，梅花看傍戰場開。

辛卯十月二十日蒙 恩復官參佐蜀中軍事

感遇攄忱得詩四首寄京師及故鄉知舊

刺閨書裡

八行馳戎幄來宣感涕滋再入中書嗟我老三登啟事

愧人知

予自從軍入滇前相國春和傅公前將軍雲素岩阿公及今將軍溫公前後凡三經補牘矣

心正集蓮花幕清夢先依藥樹枝對仗哦詩磨盾檄一

官前後總

恩私

身在軍中被

詔溫除官免謁選曹尊

凡奉特旨選除者例免謁選

夜春米更喧

羸婢月給錢還乞穉孫十載踏迴牛磨跡

予自壬午服官至今辛卯

怡十年

九重掃牘鳳巢痕

中書舍人有兼司經局正字者一人予前適除此職近見邸抄已議載矣

似與坡公詩意
適相比附也

他時曝背茅檐底半話金鑾半玉門

借箸頻煩對夜分居然長揖作參軍橫戈襍虜忘衆澤
調鼎元臣念策勲未遣邊城休宿甲猶聞閭井望春耕
近從父老聽

明詔揮涕爭傳

盱食勤

近屢降
得已用兵

明詔諭以厯念戎行不
感奮泣下

獨上高城攬夕暉霞旌霜戟自成圍長纓肯讓終生請

神筆思憑葛相揮玉壘陣雲初壓帳金江戰血尚沾衣

此南大金江在緬甸境
予已丑隨征屢經渡此

誰知矢石林中客已許餘生對

紫薇

至日山神溝作

枯崖枯盡不回春
無藥苔梅已作薪
萬里冰霜長至日
四年戈甲未歸人
蜀戕孽處軍書亟
鄆酒傳來驛遞頻
時有餉以
鄆酒者 猶有餘生
賜環後鼓笳聲裡望

楓宸

軍中夜起簡儉堂

凍雲忽捲亂山層
中夜支筇感不勝
獨倚悲歌刀作響
倦偃病骨被生稜
林霜暗入三更柝
崖雪晴飄萬帳燈
欲就故人話尊酒
醉來還恐涕沾膺

暮至尤溪

兩崖一綫走陰森，班馬凌兢有戒心。
雪似凍鴉翻絕壁，石如飢虎攫空林。
橫橋入市人聲襍，候館懸燈夜色深。
不用繼庖煩長吏，龍溪茗椀豁愁襟。

尤溪一名龍溪，產茶最佳。

宿汶川縣作

朝發尤溪驛，夕宿汶川縣。
山城小於斗，紛沓市廛變。
赴羽林軍顧盼炫，乘傳圉人牽馬來。
一躍走如電，回首呵下駟。
槽枥差旣遍，徵求到芻蕘。
鞭撻及丞掾，誠哉好身手。
我欲觀一戰，憐余館未定。
躑躅日已晏，幸逢查使君。
調儉故人真戀戀，殷勤掃塵榻。
咄嗟辦厨膳，燈前兩

白頭絕塞得重見妻孥何足問身在尙疑幻單行事一
槩欲言自傷賤鬱然壯士肝聞鷄感明旦

度汶川索橋

平明出郭門駕言度繩橋征人黯無語水石爲怒號入

關

江由黃勝
關至汶川

江始雄蕩激百丈濤鼉鼉駕無力乃欲

仗索綯兩頭繫巨弋歷以石屋牢如鎖支祈獸恐挾駭
浪逃僕馬戒少留短策手自操俯聆驚雷鳴仰睇浮雲
飄中流一掀簸目眩心魂搖始知呂梁游忠信良可褒
一僕送旣濟辭歸語怱怱從軍乃吾分胡爲累汝曹

過天舍山

一山雪稜稜嶄絕塞天空

去

履冰不見冰已徹九地凍

著趾滑難留何況馬施鞍十步九顛蹶夾持兩僮從每
臨走九坂騎虎莫敢動懸繩縋而下幸免回車慟翻思
上山時一筇手自控尺寸進良難失足斯堪痛如登與
如墜此理誰折衷

去

荒郵識何名燈火出籬縫羈魂暫

栖泊山鬼荅悲諷

臥龍關

青泥何盤盤大小老鵲山蹢躅兩汗脚來投臥龍關關
門踞天險險絕阻百蠻若輩譬狐鼠縱之在榛菅蝸角
鬪豈免虞階有羽干今方議捷伐千軍走桓桓捆載芻

與粟革包甲與鞍驅彼春田耦負擔耨耨環屯聚寔此地
守備宜繕完我非棄繻者行矣期生還縛賊入關後
封以一泥丸

同年朱子穎太守遠訪軍中行帳話舊有感作

陣雲頽空溪水吼礮火橫飛大于斗白頭自甘枕戈甲
寧料此間握君手憶君

名對在御苑詢及先臣

聶顏久奉

詔作畫羣公驚盤礴一揮筆如帚聞君昨歲游峨眉伏
虎岩前掉臂走佛燈懸處照無寐欲借禪床穴雙肘君

今踪跡更奇絕閑作寓公謝官守夕烽連山箭滿眼君
不來觀亦无咎君言壯志雖漸衰未肯帷車學新婦蜀
中邊患我頗悉如掣鯨鯢歸敝笥十年養癰不一決俞
扁之上亦何有軍興百事如蠅毛又苦咄嗟思辦取可
憐轉粟十萬夫盡是春田把鋤耦臣甫北征憤最切臣
結春陵意偏厚南臺寺名病起匹馬行不獨軍容觀細柳
借籌應作李左車劇孟何堪掛君口相逢剪燭話未已
却恨郵筒難致酒與君論交在夙昔風節相期頗不苟
戰場兩處所見同瘴海三年得生偶軍旅之事雖未學
出入兵間得八九惟聖有訓戰必慎行兵所戒勝毋徂

赤軍長揖敢自傲萬感橫胸鬱堆阜夜來偏師肆賊壘
裹血人歸認誰某終生長纓今在否上陣何時縛小醜
瓊廬風雪對嘆息錯比剡谿來訪友

爲儉堂題朱子穎畫扇

老樹無花石有苔小茆亭對暮江開分明一幅家鄉景
昨夜瓊廬入夢來

年來鄉思苦難緘驚馬裴徊未脫銜誰料戰塵最深處
秋江如畫見烟帆

十幅西風滿意吹江湖浩蕩定何之如何一笠佯簷下
不盡蘆中老釣師

便面留題墨尙新維摩十笏病餘身偏將蔬笋閑風味

說向弓刀馬上人

子穎養病南臺寺盡此以送儉堂從軍其自謙云聊當蔬笋之饒爾

子規啼煞去無期白髮天涯又幾絲若念滄洲舊時約此圖便是北山移

行帳臥病不問軍牘適有餉以食用之物數種者喜其適所湏也爲各賦一詩

銅爐

土銚方僵臥新爐火乍紅懸燈風未息壓帳雪先融人

忘去

征裘敝天憐客盞空圍來羸僕喜鄉物話張銅

我鄉

銅爐以嘉興張爲所製者爲最工世稱張銅

火鍋

下缺風生巽中虛火出離入裝輕最便當食緩偏宜冷
緩隨時得酸醃信手知愁聞木坪路嚼雪士多飢

豆豉

戴記傳諸醬偏遺豉法良審來成臭腐蒸處溢甘香寸
釘湘江笋絲搓蜀郡薑蕝羹忘小陸爲爾亦懷鄉

燒酒

惡旨今微禹傾來愛煉多術寒真勁疾祛病轉平和試
問杯乾未其如戶小何投醪非我分獨酌愧顏酖

南棗

如瓜寧易致致此定安期人說資難老吾欣仗耐飢經
時宜浸酒侵曉試調糜誰道東山士猶吟八月詩

腐乳

菽乳齊民饌頻經戰地無開瓶形未改下箸味偏殊豈
有輕肥相真成老腐儒近來落雙齒軟嚼日忘哺

南蝦

此亦珍南產銀鈎入市傳蝦米大者俗號銀鈎形模何瑣碎風味

不腥羶纖蛤誇同雉枯魚讓獨鮮蝦籠嘴邊路草屢憶

當年

餅

斑斕萬峯雪如麵布高低難使充人腹空教阻馬蹄何
人貽不托佐我酌偏提如此苦寒夜吳均說也悽

十二月十三日斑斕山紀事

連峯若環斷若玦羊腸一絲天際豁賊礪屹然不可拔
如獬之狂鼠之黠一軍拒左遏賊衝及山之半布成列
一軍右上盪其腦俯瞰礪樓蟻在垤朔風獵獵翻大旗
指點元戎中秉鉞是時窮冬天苦寒堅冰欲鼓山石裂
萬人裹甲如裹鐵噤不成聲喉捲舌豈知挾纊在一言
始信拊循勝鞭撻鎗丸似雨烟似墨一卒飛騰刀滾雪
上礪無梯下無穴以肉聞石怒衝髮何來援賊氣甚露

短兵一接魂魄奪殺人無聲亦無影人在陣雲自出沒
生擒一賊挾兩頭歸謁和門略陳說生因死敵互拴縛
一片糗餽刃餘血啗汝小醜特在險問天此險爲誰設
負嵎之獸且莫搜游釜之魚寧久活詰朝再戰竊有請
若徇三軍湏此卒

僕人忽以無米告走筆東明守齋

破賊何神速嚴裝辦太輕借籌猶傍午顧餓忽呼庚方
朔飢原慣泉明乞未成却思謝仁祖推辭自平生

夜泊軍書見畢秋帆方伯手跡因憶予己丑秋從

征至猛拱時畢亦於軍郵中惠書今閱二年餘

秋帆方攝陝西大中丞事而予由滇入蜀仍在
兵間感歎不已因成二詩寄之

蘭鳩萬里記從軍
插羽書中尺素分
豈料餘生重轉徙
更從此地一知聞
純羹尙動歸吳興
棠蔭初傳主陝勳
今夕戟門人未寢
也應吟斷隴頭雲

無復高樓聽雨聲

聽雨樓秋帆京邸寓樓也

空將身世感鷄鳴

賜環人老嗟如夢
結佩情深感昔盟
後死我猶思著述
得時君不愧科名
同爲簪筆承明客
雪壓瓊廬劍獨橫

儉堂昨上北山見崖石間皆松樹高者僅尺許而
奇姿鬱蟠如千百年物歸以素紙寫之勁秀特

絕爲題一詩

蠻山氣荒寒草木生意困遂令棟梁材亦莫展尺寸飽

經太古雪其骨故瘦健屈蟠出石罅鬱然勢自遠九峯

有老樵

儉堂自號九峯樵
九峯茂州山也

老未厭登頓愛松寫松影十

指掃塵空物貴得本性豈以大小論不中匠石程世外

許高遜平生歲寒盟讀畫適我願此筆可屈鐵庸以勵

衰鈍

北山行帳夜大雷雨讀儉堂從軍行有感卽次其

韻

雄雷出地鳴戰鼓白雨撒空注強弩林深夜黑火一綫

知是南山礮飛處軍中射石如射虎以石爲礮難用武
一夫肉薄萬夫譟如以千將縞穿魯千金市駿使捕鼠
蹶翻教委沙土書生行愁坐復嘆心口呿吟步旅踞
森茲小醜惡已稔豈有皇天縱逆虜抗

王命者殺無赦殷有鬼方夏有扈頗聞葛侯守謹慎子
午之謀非所取燕然有筆吾肯污他日銘勲屈指數使
君壯志老未衰風貌心期兩奇古戰場英訝轉相親身
是長安舊來雨從軍一篇豪且苦想見長吟毫欲腐我
生甘與老兵伍夢斷春明座依黼有苗未格干羽舞誰
階之厲辜誰府裏創人歸血濡纓國殤未招些成楚終

宵不寐撫孟勞壓陣雲深日東吐

過白素菴觀察行帳有贈

盛年風采動臺端百戰場中老據鞍諫草避人焚已久

頌棠隨地憇偏安

帳外有嘉樹可蔭

客逢塞外交逾密事到兵

間論轉難誰道香爐茶碗側

時贈以藏香蒙茶甚佳

挑燈一劍幾

同看

曉起卽事寄吳竹嶼

披裘愛看曉山蒼病骨緣知不戀牀激灩翠尊雙頰暖

玲瓏白髮半梳涼彎弧橫劍身空在問壑尋邱道未忘

寄語故園隱君子松風夢可到沙場

楊明府

夢槎

問疾口占示之

裹創人尙枕雕戈莫問書生有薄疴暑雪晴雷覩氣候
軍籌民瘼托詩歌長安舊雨如君少短髻新霜覺我多
未必玉關不生入五湖猶欠兩漁蓑

雲巖先生兵抵美諾追陪夜話有感而作次家雲
松韻

笳鼓聲沈劍氣寒依然奉席接衿聲喜心倒極驚三捷
岐路依違愧一官主簿參軍從位置兒童走卒問平安
細論兩戰場中事白髮門生感萬端

凌烟褒鄂久凋零

朝野羣瞻傳說星誰遣窮邊籌未定遂教折坂馭重經
降旗間道爭投款賊壘連山待勒銘爲謝蜀中諸父老
錫彤恩詔我先聽

乞畫一百二十四韻寄贈王健爲明府

鳳儀

昨開君素書如共翦燈語磊磊見意氣綿綿感心腑斐
然情文兼風格近典午手熏蘅荃蕪步節珩璜瑤恍披
光明錦必出天孫杼所悲生同岑廿載晤言阻自我從
軍行幸近花封古君亦奉符檄橐管趨幕府謂言握手
易互作窮塞主懸匏繫何爲漂萍泊無所合併尙愆期
張角逢六五知君意鄭重不在加餐勞平生抱區區思

爲知己吐岷川浪奔雷昔嶺雪飛暑中隔一千里日夕
枉延佇况我飽憂患偶倖脫網罟三寸舌猶在敢使禍
重賈鬱茲塊壘胸五岳莽撐拄今吾竊有請能事君儻
許清門擅丹青幾輩入堂廡兩髯尤絕倫

謂君與難兄
達心舍人

久重懷瓘佑昔聞唐退傅屏風競毫楮東坡笠屐圖逸
韻播蠻土願學誠太妄匪徒異出處爲君述舊游歲月
駭飛弩頭顱愧人看髀肉嗟自拊惟餘好竒懷頗毫或
有取浣花牋十樣君畫準此數一圖虎山橋探梅倚柔

艣帽簷壓風雪指點問郎醉

鄧尉探梅
圖第一

一圖雲林寺冷

泉潑衣亭晝夢隨輕颺引入萬松去

雲林銷夏
圖第二

更憶辛

已秋卸帆自孤嶼遂登雁宕山瑰怪圖經著天台雄渚
東持比乃邾莒宴坐臨靈湫百面震雷鼓璇扃宵沈沈
白氣裊一縷我向諾巨那乞石平似礎入山兩汗脚快
洗碧玉乳癡龍且安眠亦莫敢爾侮此圖重于鼎君以
弱腕舉筆勢挾瀑勢經外扣餘怒

龍湫濯足圖第三

是皆少賤

日吳越視庭戶水餐就漁磯岩宿寄樵鳴相於結汝社
還往足鷄黍詩多正始音淳悶同祝敵一從落人海此
樂不我與繡衣被廟犧瓊粒竊倉鼠抗塵復走俗顧影
中自憫維時闢西館著作盛鵷序史鑑評千秋方輿考

三輔

予在館承修通鑑輯覽及一統志蓋纂輯直隸省甫竣而罷

我實預編輯燒盡

如椽炬

修書圖
第四

其年

帝秋獮清蹕忝陪扈于田馬蕭蕭在囿鹿麇麇對仗揮

制草動色飲飛伍

塞垣簪筆
圖第五

校書天祿劉賦射華林庠

二事試入畫差足洗寒竈噫嘻遇何常升沈難逆觀芳

蘭曷爲鋤叢桂奚以斧獻玉詎招刑投珠胡見拒得馬

焉足憑亡羊寧尙補一跌六七年荷戈走邊圉敢辭辱

泥塗聊比越草莽單車乍離燕短櫂旋過楚曉臨弄珠

舉暮托捐佩浦驪聞隣船笛嘹唳出汀渚湖天月忽落

楓林颯寒雨衡烟哀狝鳴跋水瘦蛟舞未出玉門關已

使感羈旅何如青衫人送客江之滸

夜船聞笛
圖第六

洎入征

南軍王事念靡盬病來全似疴食至半疑蠱嗟戢筋力

衰魑魅恐難禦行行大金江毒漲沸如煮助以擲鷁風

萬室失保聚我駕獨木舟簸蕩身偃僂刀箭紛滿眼浮

骼碍洲渚一羣犯黑來勢已等騎虎藐焉六尺軀輕捩

窮蟬羽

金江雨渡圖第七

生還眞偶然仍逐防秋侶瘴鄉居何

陋敦樸擬鄒魯借箸幸多暇雅歌從

去征虜

謂大宗伯雲岩先生

城南湧珠泉日涉比園墅

泉在永昌城外古易羅池也

纍纍蛻地穴

若可穿以組孰云泡易滅宛在玉盤貯庶幾濠上觀藉

遣謫居緒

翫泉圖第八

蜀孽兩金川僻處越塗禹

山名怨則閭

蠻觸眦則倚蜚駟誰築籌邊樓而不備桑杜

王赫斯有征重臣寄心膂我亦承

賜環星言赴益部昨冬掃一窟檻車繫其父圖籍無可
收安問故鐘虞降人接踵至哀涕被奎蹠一刀尺有咫
擎獻自蠻豎其詞劇嘍麗略不辨儂汝譯者以臆對匪
云實筐筥執牛與露犬件繫在軍簿感此不殺恩願供
香一炷報之雙錦段燭下數摩撫霜華何稜稜冷氣逼
眉宇十步五步間鬼物近斯沮誓將兩酋血爲刀旌厥
武蠻人獻刀
圖第九君圖此四者所遭果孰愈荼蓼不同根非
辛亦卽苦行年四十九志已絕華廡生還豈不懷海畔
有環堵我家非素封義方秉遺矩泉明勤責子康樂蕚

述祖誓墓右軍文思歸季倫叙束臯卜丙舍前場後爲
圖春及童抱耒秋至婢春杵白頭好兄弟佳目速肥羜
淵也稍嗜學不競紫囊賂一經授先正津逮在訓詁毛
鄭如可作中流藉砥柱沒齒廼無憾願宏責良鉅圖成
當息壤不死天所予

丙舍投詩
圖第十

君畫過王宰我詩慚杜

甫發函定絕倒筆墨代編紵蒙莊說畫師盤礴動當宁
問君一揮洒呼醉盡幾甌經營極意匠擺脫宜和譜他
時脉哲舅

謂蓬心舍人

難着顛崖樹

姬隅集卷十

已酉閏端午男秉淵
恭校於錦城旅館

姬陽集跋

余自丙戌夏至京師始識璞函先生於薇省嗣同直樞
禁昕夕相依先生每成詩文輒持畧予予頻以才大如
海心細如髮爲頌先生必笑而頷之後先生從軍於滇
聞其著述益富昨冬暮余視學蜀中先生亦適隨溫相
國幕府來川顧以先期赴邊陲迄今尙未得握手也比
奉先生手書云有姬陽集三冊存渝州守朱子穎處屬
取讀之因於校閱餘暇反復咀吟較前氣愈傑品愈高
直欲與少陵東坡並驅爭勝而先生所歷之地之事之
時則又少陵東坡所未嘗歷者古人云窮而後工又云

讀萬卷行萬里先生固當之不愧矣而猶不信其爲必
傳無疑乎朱太守先爲抄得前兩冊以匆匆北歸未竟
其事余乃命小胥補寫第三冊因致書先生乞留副本
而以原稿寄還謹書數言於冊尾以識步趨飢渴之意
先生長嗣名秉淵年纔逾冠學已大成雖未知後之論
者與斜川集何如要之非宗武宗文輩可同年語矣
乾隆壬辰季夏上澣閣侍馮應榴題於渝郡試院